

四庫全書

集部

欽定四庫全書

集部

御訂全書增補中州集卷四十五

詳校官中書_臣張虎拜

主事銜_臣徐以坤覆勘

總校官編修_臣王燕緒

校對官編修_臣勵守謙

謄錄監生_臣黃嘉績

欽定四庫全書

御訂全金詩增補中州集卷四十五

李俊民二

以下從鶴鳴老人全集補入

蕭權府三害圖

長橋之蛟南山之虎在彼州曲父老所苦豈獨苦此亦有周處周乃慨然恥聞斯語薄險投深踊躍健武爾蛟既除爾虎既去周乃自勵履規蹈矩爰以將種效忠典午按劍西平負節克舉瑕以瑜掩過以功補身雖云亡

名播千古

止姚亞之封羊

養生之鞭隴種之苗欲魯去朔在齊聞韶咄嗟老饕腹
如瓠枵踏破菜園合喫藤條

焦天祿野叟聽音圖

梨園弟子天寶之後誰其知音百歲遺叟曲終悵然淚
迸林藪時清眼明萬事緘口

唐叔玉韋生卧虎圖

梁鵞之養或失其時曹公之肉不救其饑羊質而皮狐
假而威誰能於此辨是與非

學中史正之會客

有懷伊人在泮飲酒我客戾止嘗其旨否未見君子我
心孔疚惠然肯來小大稽首

煙江絕島圖

江風不波峭壁森立冥冥飛鴻翔而後集

雙松古渡圖

傾蓋相逢堂堂兩公寂寥渡口以濟不通

古柏寒泉圖

冬夏長青晝夜不舍拔本塞源豈知量者

紙扇

竹疏而骨楮剝而膚權以行巽風乎坐隅

樓扇

直節貫中怒髮衝上朝蠅暮蚊畏風長往

成之夜談省庭新事

偉哉青雲器底蘊莫能見開口論利害坐客服雄辯汪
汪江海量氣不許黃憲從來布衣願一擲輕百萬投瓜
必報瓊豈望在焚券雖承雨露恩慷慨輒自獻與其便
於已孰若於國便蓋嘗推此心天下欲兼善儒家惟有
孟日夜講不倦儻以利為利請看貨殖傳

復和

驅馳戎馬間太平不復見往往談雋永寧許齊士辯有
田宜早歸奪恐遭竇憲再三欲買隣愧我無千萬難倩

沽酒奴侍立便了券籌堂天下士風度邁羲獻別後曳
裾人造門恨無便握手再相逢虛左待益善平生身口
累老大折腰倦莫訝陶先生自作五柳傳

鎮山堂

崢嶸屋下城突兀城上屋初看頗驚眼再見堪捧腹能
無鬼神笑可奈瘡痍哭不哀梁閒叟欲竭南山木

稽康淬劍池

尋常論養生未得養生說擬從林下游一書交盡絕既

無當世志安用三尺鐵
頻頻石上磨神光浸秋月
可憐麕踈甚自謀何太拙
危絃發哀彈幽憤終莫洩
死留身後名有愧侍中血

樊噲戲石

丈夫氣慷慨隱迹在東市
或逢逐鹿人乃棄屠狗事
壯哉鼓刀勇傍若舞劍地
遂推拔山力自歎時不利
至今空山石傳是將軍戲
能興卯金運頗與黃石類
不期兩都後復有三國志
過客對春風徒灑山陽淚

寄籌堂

老為人所憐貧恨友獨寡等閒門外車盡入宰肉社欲
隨射虎將爭奈無匹馬安得化為雲四方逐東野大庇
天下士擬作萬間厦顧我葢頭茅寧肯助一把非無問
舍心或恐卧牀下縱有願留人有館不能假還因索居
久往往罪商也須待舍館定然後見長者

廟學落成

斯文天未喪吾道有時厄方嗟鳳兮衰遽歎麟也獲繼

遭秦焚書又被魯壞宅邇來天下事多自馬上得不修
下車禮不獻在泮馘不授羽林經不講博士席龐若沒
字碑肯見一縫掖偶因長樂老盡挾兔園冊及見中選
人始知為學益學者如牛毛自古數獲澤連年取青紫
易於地芥拾爭將逸駕攀遂向塞路闢揮之無倚門從
者皆入室肅肅俎豆風洋洋絃歌邑幾時復論秀四海
望偃伯真心嚮者誰世無秋風客

德老栽花成竹

芍藥花

物性隨所移歲晚氣自變失卻本來身還於身外見得
參玉版禪如對菩薩面叢林一花祖派入香嚴傳

劉漢臣堂甫北歸

哀哉同隊魚盡在古池裏縱免鼎中烹將見渴欲死造
物何不仁豈獨困二子我雖江湖心恨無斗升水

史遂良索詩

立身有道邦誰似直哉史流傳百世後各各異行止許
史有何厚在漢勢如彼安史有何薄在唐亂如此人之

賢與愚皆為類所使近從儕輩中偶得一狂士未能通
一經謂可拾青紫時時出俚句技癢不自己只恐落調
歌難入知音耳縱橫言世事不顧刺舌恥焉知阮嗣宗
口不挂臧否年高鬢如雪鄉曲所不齒試與阿戎談吐
哉犂之子

男牛子

留別李巽之

癸卯三月十七日癸巳

嗟嗟平生交所恨不耐久幾年戎馬間太半正丘首憶
初識君面同門皆小友倏忽五十春相見成老叟淹淹

泉下人樹拱骨已朽崎嶇見在身何幸得此壽感慨歲
云晚哀淚迸林藪古今均一夢萬事付杯酒

司諫許道真徵復圖

君不見退休綠野平淮相靈臺不許丹青狀又不見五
湖歸去鷗夷槳越人爭鑄黃金像功成身退天之道道
直天憐去官早鹽梅須借築巖人羽翼重來採芝老袖
中諫草力回天害除利興車載懸何憂不識荊州面圖
畫如今處處傳

雨雹

庚子年四月二十八日壬戌大雨雹五月七日八日
又雹按左傳昭公四年魯大夫申豐曰聖人在上無
雹雖有不為災以古者藏冰為禦雹之道祭寒而藏
之獻羔而啟之今棄而不用雹之為災誰能禦之由
是言之禦災其在人乎感而賦詩傷今之不如古也
按月令仲夏行冬令則雹凍傷穀注子之氣乘之
也陽為雨陰起脅之以為雹

雲龍失守元氣乖隱隱愁聽狂車雷須臾飄驟不成雨
一天風電從何來交橫散落星石隕紛霍迸擊冰山摧
坳平忽訝坑谷滿坳起俄作丘陵堆驚忙飛走殘殀夫
斷喪枝葉枯根莖穿窻入戶彈相射填街溢巷杞莫推
恢恢難補天網漏凜凜欲壓坤軸頽一方生理遭殄瘁
造物不恤空自哀是時仲夏行冬令誰把四序顛倒催
雖有舜紘愠不解孰謂鄒律春能回陽雖位降乾道在
一陰纔進力可排履霜之漸此其始司寒挾黨結禍胎

春秋大小百餘國獨向魯地三為災

左傳僖公二十九年昭三年昭四年

大雨電

世間萬事豈不見那用區區書觀臺我思天變豈

徒爾以象告人當自裁

鼎齋

司馬景仁因病瘧而得腹疾鼎齋療之而愈因索詩
為賦

茂陵千載文園客流傳耳孫猶病渴引飲自嫌江海窄
家無麴蘖奈腹疾水帝之魂成水厄女丁婦壬不相得

始圖一溉滋湯旱卒見九河歸禹畫嘗聞秋夫曾療鬼
大勝偏鵠能起死君不見上醫可醫國異哉鼎齋堪鼎
食

兒輩剡木作匙

一震之威乃如此坐間或失將軍匕不能更染公子指
有意欲割崑奴耳小兒造物窮物理斗柄之揭如其尾
雖然劍頭有炊米又愁遇著捩手鬼

聞蔡州破

甲午年正月十日巳酉

不周力摧天柱折陰山怨徹青冢骨方將一擲賭乾坤
誰謂四面無日月石馬汗滴昭陵血銅人淚泣秋風客
君不見周家美化八百年遺恨黍離詩一篇

和秦彦容韻

彦容寄詩有先生高見真吾師速營菟裘猶恨遲窓
明炕煖十笏地松風蕭蕭和陶詩山野已尋雲外路
直入天臺最深處踏開李愿舊游蹤請君自草盤谷
序之句故依韻和

養賢列鼎手自烹燂調元化和如美馬蹄一蹙燕地裂
檀裘尚拂陰山雪將軍表請願出師壯士戈揮惟恐遲
武成纔試二三策黍離已見閔周詩縱橫門外豺狼路
我老此身無著處君不見平淮十萬兵猶向襄陽守失
序

見征淮漢

君不見子幼自勞羔日烹何如命駕季鷹吳中煮蓴羹
又不見姜侯設鱠鑿氷裂何如徒步拾遺長鏡黃獨雪
幸遇南來董鍊師說似壺天日月遲謫仙之游乃非謫

長安道上斗酒百篇詩蒲輪休指商山路得到白雲採
芝處諸生待揖隆準翁馬上未遑事庠序

獵犬已為免死烹猶向漢俎分杯羹腳靴手板凍欲裂
尚立唐堦沒膝雪三寸舌為帝者師終比赤松見事遲
相看一笑在目擊何用左思招隱詩出門便是天壇路
雲間指點巢仙處不辭杖履從子游王者之後養老在
西序

時寄王子榮西齋

穀因辟後厭鼎烹那在丘嫂轅釜羹冠未挂前已先裂

一簪卻上山頭雪我雖無師心我師速修何恨下手遲
論中自得養生理筆底盡是游仙詩休向回車問前路
終須有箇安排處晴窓點檢白雲篇不知誰為作者序

不嫌瓠葉日猶烹不羨公子染指爭龜羹不把荷衣等
閒裂不羨曹人共服麻如雪愛身肯似賤場師凡骨只
愁輕舉遲北山未出移休勒東老雖貧樂有詩望中雲
海蓬萊路誰道樂天無歸處一千年鶴再來時行雁難
將兄弟序

暴雨

秋夜暴雨上漏下濕終夕不寐因得鄙句奉呈

疾雷破山雲暗天雨脚不斷如麻懸淋浪一室無乾處
何異露坐乘漏船鼠牙便是潰隄蟻牆有百道飛來泉
狂客豈因狂藥使眼花如落井底眠採石江頭弄明月
一夕去作騎鯨仙我雖忘我亦可憐但恐不免蛟龍涎
苦無根源笑潢潦可能朝宗東注覓海道君不見耒陽
禹力所不到至今難尋杜陵老

剝蓮蓬

相將去採秋江蓮青房戢戢實且圓倒數收葯亦可喜
春筍未剝空流涎玉井有花開十丈至今依舊藕如船
試索綠莖不尋藕與誰共此從巢仙

遼漆水郡王降虎

陳從和之遠祖

秋風漸高秋草衰空山校獵千騎圍突然有物勢驚猛
萬里侯相食肉肥橫行妥尾不畏逐挾乙似有百步威
當時扈從懦於鼠雖欲下車人共非將軍一奮躍身出

氣雄志勇捷若飛攘臂搏虎虎負去須臾帶皮擒虎歸
北方銳兒皆好武無愧匹馬及短衣聲名赫赫振前古
欲笑馮婦膽力微昨田命氏恩澤異至今漆水生光輝
君不見射石李廣一箭亦可喜死不封侯知者希

遺善堂

雪巖老人欲其子孫之善何如是諄諄也哉有子仲
賢以其遺命書之於堂訂曰遺善遵而行之朝夕於
是其命之使行者不敢不行其所行者皆善事也命

之使不行者不敢行其所不行者皆不善事也非惟
不失士石子之行其孝子之心何時而已耶噫處世
兵革之間不忘於善亦所未聞故喜而為之詩

君不見遺子韋侯只一經相門出相那在金滿籬又不
見燕山教子以我方靈椿老去五枝丹桂芳破散錢堆
一百屋紫微不願有子如窟郎陷為天下輕薄子伏波
不願有子學季良身前身後事茫茫我恤我躬猶未遑
長把賢愚挂懷抱請看積善之家遺善堂

贈出家張翔卿

翔卿河內人也。籌堂毀其簪冠，使復儒業。昔唐李素
拜河南少尹，呂氏子杲棄其妻，著道士衣冠謝母曰：
「當學仙。」王屋山去數日，復出間詣公，公立之府門外。
使吏卒脫道士冠，給冠帶，送付其母。事類翔卿。故書
大袖斜襟麤布袍，髻了撐似彌明。高滑稽自謂世可玩，
清淨不守形。徒勞百年光景已，強半容易便把青春拋。
欲向蓬壺尋福地，奈何龍伯釣後負山無海。鼉欲駕天

風朝帝闕奈何巫陽去後九虎守闕牢養生未獲一溉
力那忍遽絕平生交但令造物哀正直豈肯屈曲從仙
巢留侯學道欲輕舉尚且強食扶金刀安期當年本策
士意氣直謁扛鼎豪平地作仙亦不惡或恐上界官府
名難逃君不見醉吟居士不歸海上山又不見昌黎先
生屈曲自世間况非出塵風骨羽化難夜叉白日守天
關黃庭正恐坐誤讀鐵鎖縱垂那可攀我笑學仙王屋
著道冠只待河南李侯脫去然後還

籌堂燕

籌堂梁上巢燕將雛幾墮鼠計飛鳴哀訴者久之主人得其情而護焉卒無所害夫舐犢之愛物物皆爾感而為之賦且以戲克紹

陰陰池館落花泥出入通家獨見知曾遭江上淘河嚇又被巢邊野雀欺且欺且嚇亦不惡奈有鼠輩窺其兒兒方在卵卵何危哀鳴若訴奚勝悲主人能得腹中事百計護持彼毒無所施羽毛養就刀剪齊雄雌相隨引雛

飛尋常百姓家汝巢非汝宜春分來秋分歸莫忘烏衣
巷裏時

趙倅司馬山謝雨

乙未歲旱自春徂夏五月丙申澤倅趙公唐齋沐潔
誠就司馬山祈禱八日庚子大雨年穀遂登民物安
逸累獲嘉應次年丁酉孟夏己丑公與本郡僚屬父
老人等具牲幣酒醪簫鼓之禮仰答神休仍求嗣歲
祭畢聊識歲月云耳

去歲不雨民憂深，愆陽亢甚多伏陰。冥冥造物豈難料，
感以志誠神所歆。我公默禱若響應，出岫誰謂雲無心。
天瓢疑是池中水，三日以往皆為霖。淋漓元氣滿人望，
解慍何止薰風琴。家家豚酒樂豐歲，空山鼎沸簫鼓音。
春祈秋報有常典，仰荷靈貺如桑林。

四舍人生日

驥之子鳳之雛，精彩丰容美且都。年至十二三頭角，已
異同隊魚。積善之家慶有餘，掌中幸得雙明珠。定知他

日必充問不妨更讀古人書絳帳先生當今之範模步
亦步趨亦趨執經北面預先講唐虞明主何嘗不用儒
相門出相文可無豈獨手撫金僕姑能騎生馬駒然後
稱為大丈夫

贈儒醫卜養正

孰親如身在所慎一病能惱安樂性囊中探九起九死
以其病病人不病豈獨和扁號神聖能於鬼手奪人命
嘗聞上醫可醫國何不使權造物柄

樊氏昆仲懶窠

君不見讀書邊孝先謂師可嘲何典記又不見梁州陰
子春足不肯洗恐敗事何須向人說道理養得疎慵性
如此擺手便行誰家子嵩洛之間兩居士未嘗點檢形
骸外挂角羚羊心已死問之非漁亦非樵人言似癡還
似高叔夜自知不堪七以書遂絕平生交一官從此束
高閣賴是天教閒處著時人爭賦懶窠詩我羨懶窠詩不作
壬申歲旱官為設食以濟饑民

千里地赤澤未霑驕陽為沴烈火炎就中秦頭晉尾旱
魃所棲託十室九室突不黔撐腸一飽豈易得咀嚼草
木如薺甜山川課雲職不舉無奈風伯號令嚴民是天
民天自恤何時霹靂起龍潛

男楊洗兒

十九歲

自慙無德為兒父今朝把酒為兒壽為兒今賦洗兒詩
願兒他日於兒厚我猶不恤況我後委蛻自天汝非有
速宜修德大吾門無復童心年十九

兒歸來禽名

兒歸來兒歸來百年郎罷恨何日寧馨回東去但除嚴
母墓望思空築茂陵臺兒歸來兒歸來一聲未盡一聲
哀

贈郭顯道醫

惡石聚散元氣樸本草搜剔造化窟俱收並蓄籠中物
山精水怪藏不得休言魄為天所奪入其手者命可活
須防姮娥去奔月大勝扁鵲能起號君不見錢子飛樂

不敢施為鬼脅

和答董用之

將軍死戰血染衣空山白骨鬼夜啼洗兵正要及時雨
天禍未悔無雲霓卧龍不起主張漢獵犬待烹僥倖齊
就中儒冠身多誤如坐矮屋頭常低敢將龍鍾衰造物
但幸老大能扶犁咄哉董生三寸舌善謔不思為虐兮
人間回首憂患始去之不速將噬臍

再和秦彥容韻

屢屢歌後伏雌烹箸猶未下愁覆羹布衾多年踏裏裂
夜半寒窓灑風雪待與重尋痛飲師東山杲杲日出遲
撐腸拄腹文字五千卷一字不入高人詩幾年不踏紅
塵路直入白雲最深處君不見洛陽城下來歸鬼一夢
思鄉歎溫序

答祁定之韻

黃菊催秋暮青山勸客歸事隨時漸改人與物皆非爽
氣收殘暑閒雲送落暉平生會心侶別後往來稀

遊太平泉

稍有林泉興相陪杖履遊百年人易老千種事堪愁是處花無主誰家酒可芻芳時好行樂春去不能留

宿夾谷彥實菴

挂名仙籍上晦跡茂林間門外丹河水牆頭明月山境隨心自遠人與話俱閒應笑紅塵客區區漫往還

河橋成

橋成有日必有佳句寫河上逍遙之興贈子榮及督

役楊成之

河廣思同濟天寒怕涉冬冰雖將自合船尚不宜從柱
引來歸鶴淵藏未躍龍一編圯上叟千載願相逢
勢截長河浪橫陳百步梁經營方斷手過涉不褰裳漫
惜千金飭休誇一葦航西風簫鼓咽真酒水仙堂

癸巳冬至

昔愁天紀亂依舊日南時氣本自然應策今誰可推每
懷添線女還憶覆杯兒偃蹇無歸計天涯兩鬢絲

歲以四時成氣自一陽始雖然廢義職那可亂軒紀人
生幾寒暑天道頻甲子徒嗟潦倒身汲汲百年裏

任仲山弄璋

奕世多陰德傳家得寧馨人間熊有夢天上昴無星喜
洽犀錢座光生玉樹庭鍾情笑盧老白髮望添丁

五哥生日

落落青雲罷天然骨格奇自從懷橘後每恨學書遲全
樂憐荆樹相煎笑且其氣豪常自許躍馬是男兒

代四哥贈

相戒南陔養長看花萼輝義深姜季被恩重老萊衣隊
似魚同戲行如鴈共飛讀書當自勉繼取錦衣歸

四哥生日

秀出三株樹芳聯五桂枝杜家憐驥子徐氏種麟兒已
有高門望方當志學時一杯添壽酒滿酌不須辭

寒食

為戀風光好那堪節物催事隨浮世往花似去年開莫

灑無家淚須傾有限杯詩人多少興都向醉中來

九日下山

宰肉陳平社折腰元亮鄉車無門外轍菊與徑皆荒所
恨國難守若為家不亡天威寒氣逼急急下山陽

王生壽日

幾度縣弧節當年琢玉郎徐行知禮讓幼學愛文章莫
厭魚同隊休隨燕入堂眉間色多喜禁鬻近東牀

游青蓮

閒攜方外友同謁梵王宮山吐三更月松搖萬壑風流
年飛鳥過浮世落花空不有歸來興何能見遠公

遊碧落

已亥仲夏十有九日平水曹漢卿楊子平本郡李鑑
臣劉濟之君祥姚子昂史遂良全謁治平院與上人
和霽月煮茗道話抵暮而歸

寂歷松間寺臨流勝槩藏斷雲開石壁橫吹爽溪堂漫
語詩情在留連道話長行人貪弔古歸路半斜陽

御訂全金詩增補中州集卷四十五

欽定四庫全書

御訂金詩增補中州集卷四十六

李俊民三

食芡

池底休鋪錦鷄頭自有裁柔中皆水性剛外乃天才精
彩惟魚目珠圓出蚌胎坐間咄嗟致不似荔枝來

潁陽元道人虛白菴

有山心可算有水耳堪洗飄飄元逸人寓意在山水勘

破人間世不聽心與耳一室虛生白自得吉祥社

八日登山同謁吳王祠

四月

老樹凋殘盡靈祠寂歷中古今時易改幽顯意能通歲
享屢登樂俗追三讓風送迎人散後日落亂山空

陽城懷舊

呈陽敬之燕子和李文卿

路梗傷時事春歸感物華風波千萬丈烟火兩三家樹
杪失巢燕牆根無主花當年人不見何處是生涯

道途行處惡故舊別來稀澗口分流水林梢挂落暉好

山留客住幽鳥背人飛門外秋光老征鞍尚不歸

上長平寄楊成之

衰遲長在外矍鑠愧征鞍世路驚心惡天風刮面寒迢迢人漸遠冉冉歲將殘今夜梅梢月同誰共倚欄

河陽呈苗簡叔

妖氛長斗北殺氣尚河東人物不如古地圖祇自雄三城環野水二麥卧天風多少逃亡屋荒涼晚照中

即事

炎涼愁裏過陵谷暗中遷素拙生生計尋耕下下田為
嫌頻告糴却恨不逢年門外催租吏長妨對聖賢

中秋對月

雲山懷素隱秋興暫來歸月與人同醉星隨客漸稀入
河蟾不沒遶樹鵲何依浩氣凝光界瑤臺夢欲飛

山中寄張漢臣李廣之

枳棘非所棲繫匏馬不食未點墨子突又奪伯氏邑一
年三褫服半歲兩塗救歸去來山中無喪亦無得

經童

盈門修鄭簡同隊執章經蘇子應千里徐兒尚九齡鴈
行成次序鶯語太丁寧堪笑西城老朝朝酷教刑

自遣

居閒聊自適造物果何如生理年年拙交情日日疎
猶聞跼犬技可笑黔驢誰識徘徊意西山有舊廬

小旱雲而不雨

阿香誰使送雷聲敢望天瓢一滴分恨魃長為周地虐

憫厓幾被魯人焚風吹海立垂垂雨澤與山通處處雲
何事卧龍猶不起得微往見葛陂君

注山谷得微往從董父餐寧當罪繫葛陂淵

復用韻

區區布穀不停聲安得銀河水半分湯稼未應枯後溉
周川豈獨旱如焚是誰阻當知時雨有底商量出岫雲
造物不為天下計只將花事了東君

十六日雨

平地俄驚霹靂聲老龍功過此應分不知東海因誰祭
却笑西華欲自焚四面蔽虧無日月百神奔走會風雲
時人那識天公事一漑惟知有巨君

王子榮過家上冢

暫領元戎小隊行盡驅春色入山城蔥蔥佳氣隨軒蓋
嫋嫋高風卷旆旌題柱橋邊男子志散金閭里故人情
貴游前後知多少不使堂虛畫錦名

州有畫
錦堂

用趙之美留別韻

平生藏器待何時除卻荊州不可依預報行人應鵲噪
相將送客有花飛鴈從去後弟兄少罵未來時朋友稀
不盡赤心今日話東山無以我公歸

重午偶題

龍鍾歎我百年身幾見山城節物新水荇長如牽翠帶
石榴半似蹙紅巾可憐今日依劉客便是當時弔屈人
誰道南來風解愠試從比屋問吾民

春日

白頭不奈隙駒催，慣飲屠酥最後杯。
百歲無多偏晝短，一年將盡又春來。
東君得地權終在，北斗隨天柄已回。
造物却還真宰手，衆人今後試登臺。

和參謀李舜舉

平步青雲感遇初，試看傾蓋氣何如。
樗材應笑陳人榜，雋永爭談辨士書。
夢鹿果能誰得鹿，知魚未必子非魚。
青山馬上多詩句，北斗以南名不虛。

一怒王師弔伐初，堂堂人物古誰如。
劍頭何患無炊米，

楠鼻多應有檄書盡道公孫能躍馬應憐學士獨焚魚
旌旗未度長河水千騎元戎已擣虛

和東菴孔安道韻

淡泊生涯共一堂杖藜踏遍水雲鄉不妨廬結在人境
應念客來從遠方三笑可無陶靖節八仙宜得賀知章
袖中時出烟霞語習氣師兄亦未忘

五舍人生朝

積德高門慶有餘隔年記得掌中珠清新月窟兩桂枝

俊逸渥洼千里駒戲自老成看蠟鳳志從小異見携蒲
一朝騰踏青雲上快覩徐卿第二雛

和子搢中秋

最後賓來舉白浮要須同賞桂花秋蛾兒應恨燈無焰
嬖女能教月再修分外高寒天上闕就中明徹水邊樓
姮娥不我為生客休把光芒取次收

和子搢九日漫興

此身到處賈胡留細雨斜風冷淡秋佳節又從愁裏過

故鄉不似舊時遊
試拈紅葉題詩句
強摘黃花泛酒甌
落帽龍山幾人在
雲沉鳥沒恨悠悠

節物催人分外愁
干戈眼底未能休
丹楓落處吳江冷
黃菊開時灞岸秋
可是涼風添寂寞
更堪缺月照綢繆
悠悠今古何須問
淚灑牛山亦過憂

沁園懷古

風波平地難開眼
劍戟羣山欲割腸
冠蓋隨時成物故
園林何日破天荒
摩挲碑石空懷古
點檢圖經為補亡

誰是熙熙堂上客近來老子也和光

和即事

擬將唾手取封侯世事那禁種種愁未可搏他馮婦虎
終須享此景升牛但知勿翦甘棠在莫為難圖蔓草憂
自古貴人天所予定教名字到金甌

和新秋

簾捲西山雨乍停自知時節候蟲聲新涼邂逅如佳客
殘暑留連似宿醒可見韓檠燈下志且憐班扇篋中情

若為解得吾民愠更鼓南風一再行

寄史正之

往來門下亦風流分得籌堂幾許憂剛甚養他橫槊馬
何如了取濟川舟人還忌罷休投鼠誰為蹊田欲奪牛
聞早抽身閒處著不妨仍帶醉鄉侯

聞捷音招王德華吳天章等出山

紅塵一騎報平安知是元戎小隊還且喜好音來汴水
仍將舊事問潼關橫雲自護車箱澗落日空銜箭筈山

只恐膏肓歸不得早隨春色到人間

用之次韻復答

小齋飄雨注風帷門外青山因品題足躡盡知齊是假
膽嘗爭奈越猶棲任教別後書盈篋贏得年來氣暖臍
聊與老農歌帝力一缸村酒薦豚蹄

夜雨三首

五月十八日夜雨濟之君祥正之顯之漢卿子昂燈
下酌酒相賀喜而為之書

元氣淋漓徹九垓那消掩耳一聲雷雨雖不解知時至
雲豈無心出岫來所恨龍潛猶未起大都天意卒難回
等閒莫話為霖事且對簷花盡此杯

夜半天公號令催即時驚起阿香雷須知稼穡艱難甚
誰把陰陽變理來不使魃為周地虐定應龍自葛陂回
隣家酒熟留連客聊與愁人共一杯

化工寧許著詩催平地俄驚失筍雷行雨夢從巫峽斷
為霖人自傅巖來老農學稼無多力太史書年有幾回

愛酒陶家纔種秫何如共此即時杯

用之請還公府用韻拒之

殄寇將軍力自宣幕中議論可回天氣吞驕虜鞭先著

威定井門檄罷傳正恐一隅防飲酒

張漢臣馬武有同醉堂

休從

百尺笑求田揚雄祿位誰能動始為侯芭草太玄

弔劉伯祥

記曾林下見臞仙惆悵紅塵未斷緣不憚廣文寒處坐
屢逢元亮醉時眠難逃辰巳賢人歲有負葦鹽太學年

落落天才無地用却還英氣與山川

伊闕鷓鴣堂

同王德華子正善卿澤之焦彥昭唐俊卿張伯宜史
正之李文長姚子昂男李楊杜浩然書壁

千年古道入荒闌破屋頽垣一聚塵天地如何收險阻
山川猶覺露精神餘波禹貢朝宗水習俗周南既醉人
把酒西風無限興黃花時節對佳賓

一日灘流淺自分灘頭鷓鴣似通神大都鷺棘無多地

畢竟烏臺得幾人
浮世堂堂春易去
隨時局局事皆新
當年靈翼今何在
滿目西風動白蘋

亂後寄兄

長劍何人倚太行
羶裘入市似驅羊
怒降白起不仁趙
死守裴侯無負唐
可奈崑炎焚玉石
更堪蜀險化豺狼
紫荆猶是堦前樹
風雨何時復對牀

萬井中原草棘荒
縱橫大劍與長槍
晝烽夜火豈虛日
左觸右蠻皆戰場
丁鶴歸來遼已冢
杜鵑猶在蜀堪王

此生不識連昌樂目送孤鴻空斷腸

別邵陽申伯福昆仲

百里相望邂逅遲如今始得話心期情深堂上留髭夜
興盡山陰訪戴時客舍教人那用送異鄉遊子不勝悲
烟村水驛秦川路來往郵筒好寄詩

郭仲山生日

乘興游山也自賢千金奚羨築臺燕誰為洛下同舟友
人道江頭弄月仙欲向潼源歸舊隱便從莞谷種閒田

橐駝樹得長生理不解如君養性天

和李唐傑韻

翰墨場中第一人而今委翅在雞羣縱橫詩律凌徐庾
浩汗詞源婉典墳兵氣橫流存此老天心未欲喪斯文
年來草就歸田賦嘯傲南山卧白雲

郵筒寄後憶詩人落落英才迴出羣試問槐花忙幾舉
可憐桂子落誰墳浮沈且與陪中立喜愠何嘗見子文
傾破葵心望天表龍庭不日會風雲

隨州長官張鵬舉暨壻陳正文見過

寂寥秋思梗吟懷幾度柴門鵲噪開一話勝看江表傳
百書不及隴頭梅馬催行色日邊去鴈送歸程天際來
萬里龍庭莫辭遠中原事業望人才

剛忠公

未除妖氣斗牛間一夜長星落將壇天意欲將金節畀
人心無奈此時寒斷頭那肯降朱泚血指誰思滅賀蘭
立盡太行山上石我公忠烈不容刊

同濟之游百家巖懷郭延年有感

三月

雨晴閒向百巖游今古都成一段愁老衲解回山下虎

稠禪師

真人跨入洞中牛

陸真子

水流花落三春暮鳥沒雲

沉萬事休有道碑前空墮淚往來誰復共仙舟

辛丑中秋夜與用亨漢臣濟之君祥子昂仲寬及
諸同志聚飲於學宮陰不見月

節物相催近覺頻勝遊攜酒意何勤幾人白髮對明月
萬里青天愁片雲嫋嫋風高秋已半厭厭客醉夜將分

督郵氣味從來惡今日樽前也獻芹

戲遂良酒

莫嫌勝日燕游頻且慰寒窓力學勤白也停杯將問月
退之利劍欲開雲清光難比秋三夜痛飲何辭酒百分
況在泮宮思樂地與君共采水中芹

九日濟之君祥仲寬子昂攜酒於漢臣書齋小酌
已而乘興與衆老人會於城西馬氏東籬談笑盡
醉抵暮而歸為賦此以紀一時之勝事

相扶醉袖出西城翠展秋山一望晴坐上孟嘉嘲未解

離邊陶令話多情酒猶強飲狂時樂菊莫尋餐落後英
興盡歸來天色暮老人星散月還生

承和復用韻

草草杯盤興不妨一年一度送春忙我無酒量難投社
君有詩情合擅場衣錦堂前冠蓋貴落花徑裏綺羅香
暫時忘却愁滋味驀上心來似膽嘗

答趙之美見和

不堪春事等閒妨汲汲光陰過隙忙青眼久懸高士榻

白頭羞入少年場風從定後花猶落月自修來桂復香
休向兵廚問消息且教下馬客先嘗

之美有深鎮兵
廚未許嘗之句

李子搢約同上山督之

踏青時節醉何妨一掬歸心想見忙杖履不須從捷徑
觥籌且莫戀歡場明山秀水家家景野草閒花處處香
休訝登臨無脚力世間險阻備曾嘗

答史正之

正之至連日清話恨不能文字飲也時三月晦日

草堂深處百無妨却為高岑對屬忙

高適岑參杜
遠知對屬忙啼鳥

送春歸閨苑妖星亂世跼文場閒花空怨綠衣使煮酒
不隨青杏香見說麴生風味少尚堪留與老饕嘗

陽城題北臺觀壁

幾年空負北山移今日方知見事遲猶憶王鳧初去後
忽驚丁鶴暫來時雖無壁上題名記頗愧棠陰聽訟詩
指是荒城舊游處西風搖落菊花期

客中寒食

斷蓬蹤跡寄天涯
劍戟林中閱歲華
又值禁烟焦舉節
作周焦亦奈無對月少陵家
驚心吐吐催歸鳥
觸目冥冥濺淚花
老後愁懷誰遣得
未應端的酒勝茶

和徐子賢西行留別

便從傾蓋話詩情
風雨端能落筆驚
金馬漫誇三學士
碧油曾見一書生
竹溪花圃留連醉
水郭烟村取次行
自恨年來懷抱惡
與君相別但吞聲

姪謹甫輩縣寄魚

掣三牽兩得沈腥顧我庖廚遠未能幾度敲針無處釣
一朝醒酒不須冰居官止合如羊續命駕何須學李鷹
當念家風本寒素莫從今後熱饒燈

母師聖醉中落水用郭進之韻

無人橋上醉婆婆脚力危時可奈何賀監未應真落水
屈平到底也隨波浮雲世事黃梁夢斜日秋風薤露歌
點檢交情能有幾柴門今後雀堪羅

下黿背

浮雲蹤跡去留難
谷謗巖嘲勒我還
畢竟一身無著處
大都百計不如閒
無多伎倆三休外
是亦風流二老間
昨日主人今日客
回頭山色若為顏

許司諫歸來圖

社稷憂深志未舒
陸渾山下賦閒居
幾年不復朝雞夢
一旦翻隨隴鶴書
直比朱雲徒折檻
寵踰疎傳早懸車
商巖了却和羹事
方信旁求信不虛

寄伊陽令周文之括戶

幾年客裏厭馳驅故向伊川好處居剛受一廛同許子
誰知四壁過相如厥田不稱中中賦此事真堪咄咄書
疲俗脂膏今已盡看看鞭算及舟車

和子搢秋晚出郭

陶寫詩人得句忙舊游能復憶嵩陽山頭雲霽雨聲歇
水面風來花信香今日事雖非向日故鄉景自勝他鄉
杖藜忘却尋歸路獨立河橋詠晚涼

戲嘲

江西社裏幾詩流詠月嘲風未肯休得句不能當競病
措辭那敢向春秋笑翻王氏三株樹驚倒張家五鳳樓
帶繫雪詩三十韻勝如騎鶴上揚州

送史邦直入洛

肉山南去汗如流了取公家事便休征棹不霑瓜蔓水
歸裝莫待菊花秋忙中暫過平嵩閣別後頻登望省樓
若問鶴鳴近消息翅翰飛不到揚州

和竇君瑞

勒石燕山後世名子孫蟬蛻起風塵誰憐喜鵲飛來意
自歎靈椿老大身愁見濯夫杯酒過夢驚蘇蕙錦書新
幾年客裏無情話一笑相逢未厭頻

實子溫宅為有力者所奪

漫勞買宅著千萬此又卜居何所從得把茅來頭可蓋
但教窓下膝能容尚憐相賀巢邊燕知為誰甜花底蜂
速向元龍問田舍暫將一榻過今冬

子榮途中見憶有先生在世人中龍三十年前到

月宮之句依韻謝答

高樓日日望元龍
未泰離離憫故宮
兩地漫看千里月
五湖能借半帆風
囊錫顓脫何難出
名紙毛生未肯通
好在沁陽山色裏
一塵寧許寄揚雄

弔曹慶之

杯酒中間氣沓拖
從教千丈起風波
絲琴世事無一可
花落人生得幾何
休向棘林長夜哭
試聽蒿里送行歌
豈容身後留榮辱
山岳鴻毛較孰多

弔王德華

衰鬢愁添鏡裏絲流年恰及夢中著可憐白日佳城地正
值黃楊厄閏時丁亥閏十一月撫柩恨深元伯母負薪情慘叔
教兒鬻體不識生前樂枉却招魂費楚辭

贈醫郭顯道

小隱嵩陽種德時智能博物物皆歸籠中無愧狄仁傑
山下常逢臺孝威子細論來生可養斬新卦得遯之肥
麕疎誰似嵇中散幽憤詩成憶採薇

焦彥昭失中子

相逢地下果何如自謂情鍾亦太愚未必珠能空老蚌
豈期玄不與童烏且憐商也無三罪尚喜徐卿有二雛
萬事盡歸天子奪速宜收淚謝玄夫

春溫軒

三尺枯桐膝上橫一彈洗盡綺羅塵芙蓉城裏誰為主
姑射山前別有人雲雨不侵行處夢丹青難寫醉時真
早尋林下乘鸞侶莫遣春溫過却春

索和長平諸詩友送行韻信筆奉呈君玉潤之資
客中一笑

青春人物正當時咫尺雲天快樂披相見便如膠漆密
此行還似箬弦離方傳細柳將軍令或賦甘棠召伯詩
待得一朝公事了聯鑣西去未為遲

此身莫輒犯針氈只合浮沈委自然久墮風波人海裏
暫依雲漢使星邊斗升乞活真堪笑青紫歸耕亦可憐
早晚皇家重名器著鞭當在祖生先

老覺麤疎過往時赤心今始為君披交情大抵無新舊
人事從來有合離見說片辭能折獄未嘗一話不言詩
河東自古文明地可惜儒冠感遇遲

又和前韻

昨晚蒙降臨無以為待早赴院謝聞已長往何行之
速也因去人寄達少慰客中未伸之志耳

縱橫入市盡裘氈一旦衣冠氣索然豈信魯連歸海上
頗哀屈子老江邊汗流石馬誰堪恨草沒銅駝世所憐

莫憚區區困刀筆論功終讓指蹤先

任仲山談西府事

德音到處下情通喜動山城百歲翁和氣挽回中國化
威聲振起外臺風少酬漢使澄清志不愧周官變理功
南北封疆歸一統太平立法自河東

唐臣滿月洗兒索詩故賦

兩滿月

白頭休恨夢熊遲却是人間久遠期有客已為摩頂記
為君復草弄璋詩一從老蚌生珠後再值姮娥月滿時

咫尺昂霄看英物不須女子作門楣

有二女

留題靳載之園亭

幽徑疎籬竹外村淡烟斜日水邊城
地形占斗辨南北風俗以人分重輕
坐上有山圍似畫樽中得酒論如兵
青春將種多才調拂袖林泉恐不情

載之子

送參謀劉君祥

寂歷書齋獨坐寒白頭羞見雪中山
虛名得失蝸爭外浮世榮枯蟻夢間
半夜朔風催客起幾時新月望君還

鶴鳴林下無人共何處烟霞不可間

馬首風花拂面寒十年兩度過陰山浮雲暮暮朝朝裏
行鴈兄兄弟弟間大抵故鄉生處樂莫教明主放時還
如今造物尤難料枉使深心不得閒

中秋

共對青天好舉觴從前三五是尋常一年佳節秋將半
萬里清輝夜未央纔向缺時舒窈窕欲從盈後斂光芒
姮娥曾得長生藥我欲停杯問此方

郭子雲酒熟同李茂卿史正之豪取不許

愛錢措大眼孔小病酒先生舌本乾債是尋常誰不有
囊嫌羞澁且留看三人未必一人損豪氣難忘習氣酸
氍毹相逢欲空去從來如此四并難

再赴陽城用前韻別茂卿子雲正之

誰使腰間印欲懸不知面上唾纔乾先生敢以督郵去
坐客莫將官長看祖席又成攜手別離杯何苦上眉酸
且休凋落高陽社來往雙鳬也不難

清明席上同史正之姚君寶子昂

浮雲雨後自縱橫不待風收放
曉晴百計花期成漫興
一年春色過清明誰家鎖燧罷
藏火何處吹簫猶賣餠
回首故園魂欲斷鳥飛只是片時程

悼亡

須信人生足別離別離不待白頭時
因憐曩日在縲絏
豈憚今朝炊廩屨中道奈何奔月去
此情惟有落花知
眼前活計無聊甚空對當年紙局碁

段侯行春顯聖觀喜雨

癸卯季春小旱清明後七日段侯正卿行縣回會名
流勝士五十餘人於仙翁山下之顯聖觀須臾雨作
自未至亥而止大滿人望酌酒相賀莫不盡酣適之
興張種德有詩因和韻以紀其勝元帥申甫段玉使
姚昇書於壁

行春冠蓋暫躊躇誰信東山面目疎興盡奚勞風送客
氣和不覺雨隨車移民雖恨梁加少腐粟尤誇漢有餘

獨歎吾儒有何貴自今牛角莫橫書

傷儒人種田事

寄答趙公定

他人共折依依柳居士但飲薄薄酒豈其必取齊之姜
又恐不為白也母雖然客或許敦龐慙愧我無白璧雙
更向稠桑老人卜準備買紅纏酒缸

姚子昂壽日

二月初三

門外風光二月初衣冠把酒慶懸弧一生接物無腸蟹
萬事隨緣短脰鳧坐上書空窺草聖醉中疥壁笑詩奴

年來世事俱嘗遍只合千金養客軀

又用濟之韻贈子昂

綿綿宗派自何時借問吳興第幾支書愛換鵞功不到
獄因劾鼠法先知為秦徒木思無地在漢高門福有基
此去鄉閭結仁愛請君聽取忍齋詩

為劉益之營中上王懷州

自分毛錐不入時如今尤恨掃門遲徒勞魏氏貪雞肋
却笑虞人望殺皮未有赤心相待處奈何白髮是歸期

儻令扶病還桑梓橫草難忘報所知

羶帳連雲逐日移胡笳月底不勝悲中原為患有驕子
造物戲人如小兒馮鉞縱彈無便去晏驂未解有誰知
天涯回首消魂處故國霜前鴈過時

錦堂碧落壽席

年五十一

年光過隙一何忙知命年來百念忘公事了時陰德大
塵緣斷後道心涼未償勇退求閒志先得長生不老方
共勸十分添壽酒莫辭酩酊醉山堂

答張文玘見戲

邂逅騷人興愈多不知賜也許全科君尤老去詩魔在
我奈新來技癢何但恨近無阿買寫憑誰付與雪兒歌
一從探得驪珠後驚倒中洲蚌與螺

贈奴

劉氏甥十一月二十一日生籌堂子

白髮因緣短犢車可憐風采外家無蚌生珠後何嫌老
鳳有毛時亦自殊會看伯仁興絡秀不妨節信論潛夫
劉生誰謂難成事將相從來有種乎

喜事相尋種種來，豈期天意一朝回。
璋從弄後熊無夢，月到圓時蚌有胎。
便可字教阿買識，那消錢為窟郎堆。
賢愚懷抱俱休挂，且盡樽前露頂杯。

和楊之美韻

光華異域仗全才，銜命怱怱出吹臺。
物外英標傾水鏡，坐中妙語落瓊瑰。
節回北闕旋如斗，名振西陲聽若雷。
若踏賀蘭山下石，國風未合入詩來。

和河上修橋

故里風光衣錦遊賦詩誰與共臨流相逢依舊山青眼
也有何愁浪白頭官渡方當橫槩日合肥正是著鞭秋
坐間有客誇雄辯不念題橋志未酬



御訂金匱詩增補中州集卷四十六

欽定四庫全書

集部

御訂全金詩增補中州集卷四十八

詳校官中書

臣張虎拜

主事銜

臣徐以坤覆勘

總校官編修

臣王燕緒

校對官編修

臣勵守謙

謄錄監生

臣黃嘉績

欽定四庫全書

御訂全金詩增補中州集卷四十七

李俊民四

和秦克容來韻

白頭羞入利名場得得歸來自遠方何日詩豪離上黨
去年道話憶山陽可憐杜宇訴亡國還笑沐猴思故鄉
不意閒中春色早黃鸝啼破謝家莊

癸酉榜後寄姪謹甫

第一科

萬軸牙籤未是多十年辛苦短檠歌敢忘奕世箕裘業
忽玷清朝甲乙科我已夢君三舉後君如輸我一籌何
二疏此去人方識名字先應報大羅

和安齋見寄調和定之

麻衣補破紙為條不羨仙人宮錦袍天地老於雙轉轂
山河眇似一秋毫煉深寶鼎丹砂就瑩徹靈臺夜月高
上界而今官府足暫游塵世莫辭勞

一字百題示商君祥

風

汝未聞天籟簸揚箕有神能清常侍暑不動庾公塵

月

過圓旁死魄過缺哉生明尚賴玉斧手再修然後成

雪

細看花是雨將見麥宜秋度臘無三白梁園誰與游

山

功名雙鬢雪心事數重山山下人家好終朝爽氣間

泉

滾滾勢長往泠泠味自清擬將修水記何況有詩情

暑

人間三伏暑海內一薰風獨詠微涼句公權似不公

寒

廣廈十萬間吾廬敞獨寒猶將折絃琴欲和薰風彈

晝

冬之日何速夏之日何遲山中無厯日遲速兩不知

夜

令乎日之夕政乎日之朝一罇待君子風雨會良宵

晴

展盡舒長景銷殘片段雲區區負暄子炙背不忘君

陰

朝見白雲縱暮見白雲橫不作及時雨何為點太清

花

惜花不論命看花須努力能得幾時好狂風妬春色

蓮

碧因圓更展紅向老猶粧鏡裏風流在人言似六郎

菊

色笑秋光淡香嫌酒力慳東籬在何處客裏見南山

草

日沒露易濕日出露易晞人生大都幾王孫胡不歸

燕

社後來何莫梁間話頗多巢泥愁未穩無面見淘河

鴈

俄見天邊字徒銷客裏魂一書言不盡為我叙寒溫

鷗

江靜烟籠雪天晴水浴衣漁歌驚不起物外兩忘機

鶴

去家丁令威化身徐佐卿不戀乘軒寵九臯堪一鳴

蝶

元從生處樂肯向死前休花底人間世如何不夢周

龜

汝殼將自遮汝腸還自割可憐一底板雖知不如愚

魚

華亭載月船長安遮日手一網腥城市吾於爾何有

蟹

食必視本草貴在精物理蔡侯何鹵莽幾為勸學死

儒

秦坑秦即孤魯戲魯尋削伊誰蹈前軌謂可東高閣

道

自知身是患常謂道無名欲作閒中友隨緣論養生

仙

千載遼東鶴雙飛葉縣鳧應憐塵世裏無地着臞儒

蟬

見桃渾不悟對柏未嘗參虎嘯龍吟子風雷振一龕

醫

愈風陳有檄止瘡杜能詩雖然醫者意何意亦何醫

卜

棄置復棄置其然豈其然百錢聊為我更看小行年

客

渺渺忘羊路悠悠化鶴身人間同逆旅誰主復誰賓

農

賣劍田園計溫家種樹書新年無罪歲事事有乘除

牧

蓑底因緣曲腰間轂簾鞭月明歸去晚想見葛洪川

射

手撚金僕姑身出矍相圃不穿百步楊志在

闕

獵

終日無獲禽古人獵在德非德為禽荒獵食吾不食

詩

裁作牛腰束愁於飯顆山近覺故步窘十債九不還

書

入室五千卷插架三萬軸何似曬書人坦此便便腹

筆

不見中書君不聞老成人為君作佳傳繼者皆尖新

墨

松間老潘谷何處得玄圭速置薔薇露詩仙醉欲題

紙

慇懃翰林主揮掃驚風雨滴滴是玄珠點破先生楮

畫

有意皆堪譜無言總是詩潭潭居相府此譽不妨馳

琴

陰壑鳴松籟空巖嚮石泉此聲并此意誰得寄徽絃

棋

縱橫連井地明暗列星圖兩角觸蠻戰一家瓜葛無

劍

帶牛移漢俗匣刃出豐城安得治復古器農不器兵

茶

人多愁水厄若箇有詩情靈草還知我平生事不平

師

絳帳風流遠青衿禮貌驕定須防射羿何必問嘲韶

學

邑化絃歌地隣慚俎豆風二三言志子六七詠歸童

仕

雖有乘桴意能忘出畫情一官百僚底是亦道之行

富

狼籍胡椒斛破散堆錢屋不見貪者愚求榮是求辱

貴

鴟得腐鼠嚇犬笑狡兔死唾手功名場不知憂患始

貧

書生祿有藉造物費亦省顏回一簞食不得盡晚景

智

樂在知幾早憂因見道遲遙憐鮑莊子人笑不如葵

愚

膏以明自煎薰以香自薪善哉柳侯意一字辱溪神

老

尊年鄉飲禮擊壤太平歌甲子君休問光陰得最多

名

求為天下士所望不亦厚得少失有餘何況在身後

友

偶因勢貴賤乃見朋得喪歲寒山陰雪獨有戴可訪

身

黃卷平生志青山現在緣百年今已半只合關樽前

影

相對鏡中真相隨月下人我今來忘我身外還見身

坐

一軒容膝安半世行脚債龐家老居士舉似無生話

卧

一室散天花一榻颺茶烟家風嗣阿誰殘月曉風禪

笑

和氣須懽伯開顏只孔方世情如苦海件件可閑堂

吟

冥搜腸亦苦，隼字得之難。作者有六義，惜哉坐一寒。

醉

愛此真珠滴，能於大道通。與君同舉白，憐我獨潮紅。

醒

暫出陶陶境，那禁種種愁。舉觴邀明月，却帶醉鄉侯。

舞

野鶴聞琴態，孤鸞覽鏡妍。為君小垂手，無地可回旋。

睡

客隨陶令遣齋甚太常嚴儻或非黃奶那知此黑甜

夢

物外日月忙人間憂患長休談夢中夢萬古一黃梁

歌

大音聲自希賞音人亦寡寧可逆汝耳不可廢作者

傲

王公輕以道富貴驕以志我見高尚人蓋有高尚事

閒

太傅懸車里仙家避世壺老妻為紙局坐隱是功夫

懶

交有書堪絕師何記可嘲不僧亦不俗似癡還似高

話

萬事就庾談一心對芝宇不知玉屑霏但見風生塵

浴

子春恐事敗終之坐水淫二者過不及何如我洗心

歸

世路雖多梗吾生豈繫匏西風倦飛翼樂在一枝巢

別

更盡一杯酒出門行路難送君過南浦忍淚凭欄干

忍

氣留臍可煖唾使面自乾無怨亦無惡此腹如此寬

蠶

蠶月始條桑息息婦姑忙天寒授衣節婦姑無完裳

織

泛槎驚誤客折齒笑狂隣莫作回文字開緘愁殺人

春

斷木纔脫粟濕薪空爆竹朝餐動及午奈此雷鳴腹

炊

旅食寄天涯愁如桂玉何莫忘生處樂聽取戾戾歌

砧

對影無情石關心寄遠衣天涯鎮長客鴈後不懷歸

琴 此以下四首和籌堂

山水有清音琅然出枯木若教俗耳聽絲竹不如肉

碁

森森戈戟心盡在皮裏着傍有爛柯人點破都是錯

書

一坑科斗灰難破祖龍惑三兩挾策人今誰席肯側

畫

手與心相應妙處在咫尺筆尖多少鋒揮掃天地窄

東郊行

四海尚干戈幾人知稼穡青青原上麥忍放征馬食

書壁

世事紛紛變人生種種愁行年三十九得歲又平頭

避亂

雪巖依日煖霜樹弄風悲山似王維畫人如杜甫詩

資聖寺壁

是誰將壁疥盡可着紗籠今代無詩史何時入國風

別陳之綱李得之南子榮

時自宋

已兆池魚禍尚多風鷁過寄與遠遊人莫待贖行貨
戲高廣之

一飲遇伶婦一飯值丘嫂徒教乞米僧時時送盧老

雨後

新秋積雨霽涼風吹我衣歲月不知老乾坤何處歸

九日答朱壽之

與客登高處節物傷遲暮不見白衣來三復秋風句

竹林

初見錦綳脫氣已傲霜雪天寒十萬夫未聞一死節

柏徑

歲晚節自抱足見有心哉游人從何處帶得春風來

槐亭

蟻穴功名重或作封侯夢主人心已閒不為黃花動

稻塍

一水自縱橫厥田無上下居民不佩犢歲事在秧馬

儒

世治其術重世亂其術輕太平然後用用然後太平

蝶

轉首一場夢驚心三月春揚揚枝上蝶不見惜花人

熊白

所居無禹廟有官升典籤掌亦我所欲二者不可兼

雪菴題錢過庭梅花圖

已把神傳畫譜又看格在詩評月落難尋清夢雲空乃

見高情

示姪輩

諸阮以富相誇二疏恐財為病濟叔不羨金埒勸兄曾有過命

淵明歸去來圖

先生從來寄傲肯向小兒鞠躬笑指田園歸去門前五柳春風

中秋

三百六旬歲周一十二度月圓試問姮娥甲子和閨到
今幾年

卽文炳心遠齋

竊笑濫巾北嶽那能補衲中條自有胸中丘壑不妨隱
向市朝

伯德仲植張長史帖

莫就嚴陵買菜無勞逸少換鵝但得雲烟一紙那在鄴
侯書多

戲沂公巨川

八仙詩裏蘇晉三笑圖中遠公說甚逃禪破戒我師自
有家風

戲武夫韓公

論功終是獵犬見事不如擒虎我願一識荊州人道莫
逢玉汝

結柳未送窮車敝衣先入歌院雖得蕭何指蹤難與老
子同傳

史遂良酒債四首

都因焚券家貧親與當墟人賣問得街頭酒價索取江頭酒債

酒誥一篇既出離騷亦可不作愧我家無阿堵笑他人飲狂藥

滌器不辭親酌過門無奈客惡未嘗解下金龜必能畫得黃鶴

從來歡伯氣和何故督郵味惡陶令無錢但賒潘子着

水不錯

竇子溫江山圖

醉裏扁舟烟浪望中幾履雲山長天秋水一色明月清風兩閒

猫犬圖

狡兔空有三穴首鼠漫持兩端我輩天生健武從渠股慄心寒

北窓高卧圖

問字不得兀兀借書不得陶陶誰遣人來送酒枕邊正
讀離騷

雪谷早行圖

積素茫茫縞衣流光耿耿揚輝行人抵死貪路何處家
山未歸

史正之喪子買得

陸郎初見懷橘阿買頗解識字或恐西河喪明忙為東
野收淚

靈照女

留下一重公案有女誰似龐家不試提籃手段若為點
破丹霞

錦堂四景圖

春水滿泗澤

蓀蓀舒如羅帶鱗鱗皺似縠紋誰道卧龍不起須臾變
化風雲

夏雲多奇峰

幸得從龍變態尚何出岫無心正苦人間畏日不思天上為霖

秋月揚明輝

清光一片如洗西去姮娥耐秋可惜廣寒人老誰將玉斧再修

冬嶺秀孤松

山前傾蓋獨倚雪裏盤根歲深千年老鶴相伴誰似蒼髯有心

御訂全金詩增補中州集卷四十七